

Isu Laut China Selatan perlu dirunding dalam kalangan ASEAN terlebih dahulu - Hishammuddin

Astro Awani

10 November 2020

Hasimi Muhamad

KUALA LUMPUR : Isu Laut China Selatan perlu diselesaikan terlebih dahulu dalam kalangan negara-negara anggota ASEAN sebelum campur tangan geopolitik kuasa besar dunia.

Menteri Luar, Datuk Seri Hishammuddin Hussein berkata perkara yang paling penting adalah untuk memastikan ASEAN berada di landasan yang betul supaya isu pertikaian Laut China Selatan dapat dirunding dengan baik biarpun terdapat campur tangan negara kuasa besar seperti China dan Amerika Syarikat (AS).

"Langkah pertama adalah berunding dengan kalangan ahli ASEAN. Dengan campur tangan AS dalam isu ini (isu Laut China Selatan), kita perlu melihat dahulu apa dasar pentadbiran baharu mereka serta apa pula pendirian negara kuasa besar lain di bahagian Utara," katanya dalam sidang media selepas menyertai Sidang Kemuncak ASEAN ke-37 secara maya, di sini pada Selasa.

Mengulas mengenai kemenangan calon Demokrat, Joe Biden pada pilihan raya presiden AS pula, Hishammuddin berkata ASEAN perlu memahami pentadbiran baharu negara Uncle Sam itu secepat mungkin.

"Adalah penting untuk melihat apa perkara yang kita boleh bersetuju dan tidak, dan mereka perlu mengetahui pendirian kita sama ada berhubung isu industri, ekonomi, keselamatan, serta hubungan geopolitik pertimbangan Laut China Selatan, misalnya," jelas beliau.

Hishammuddin turut menzahirkan keyakinan bahawa kemenangan Biden pada pilihan raya tersebut tidak akan menjejaskan hubungan bilateral Malaysia - AS.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/isu-laut-china-selatan-perlu-dirunding-dalam-kalangan-asean-terlebih-dahulu-hishammuddin-267795>